

Uunga siunnersuut: Minamata-mi isumaqatigiisummut atatillugu Namminersorlutik Oqartussat Kalaallit Nunaannut nunap immikkoortuatut tunuarsimaarfigninnermik atorunnaarsitsinissaat pillugu Inatsisartut aalajangiiffigisassaattut siunnersuut
(Suliffeqarnermut, Iisimatusarnermut Avatangiisinullu Naalakkersuisoq)

Saqqummiussineq

(Suliffeqarnermut, Iisimatusarnermut Avatangiisinullu Naalakkersuisoq)

Siullermeerneqarnera

Minamata-mi isumaqatigiisut 2017-imi aggustimi atuutilerpoq. Ullumikkut nunat 100-t sinnerlugit amerlassusillit isumaqatigiisummut atsiorsimapput. Nunani arfineq pingasuni ministerit, Issittumi nunat inuusa kattuffiinit arfiniliusunit aallartitat suleqatigalugit 2017-imi isumaqatigiisutit pilertortumik pitsaasumillu atuutsinneqalernissaa kaammattuutigaat.

Minamata-mi isumaqatigiisummi kviksølvnik aamma kviksølvinut atassuteqaatinik aniatitsinernut kuutsitsinernullu, inunnit pilersinneqartunut atatillugu inuit peqqissusaannik avatangiisinillu illersuinissaq siunertarineqarmat siunnersuut saqqummiunneqarpoq. Isumaqatigiisummi kviksølvip atuunera tamakkerlugu; piiarneqarneriniit atorneqarneriniillu aniatinneqarnerminnut aammalu eqqakkatut passunneqarnerminut maleruagassiuunneqarpoq.

Kviksølv innuttaasut peqqissusaannut avatangiisinullu atatillugu annertuunik arlalinnik ajoqusiisinnaavoq. Pingaartumik naartuut meeqqallu ineriartorerisa sunnerneqarnissaat annilaanganartoqartinneqarpoq. 2014-imi kalaallit arnat, kinguaassiorsinnaassuseqarfiusunik ukiullit affaat nunani tamalaani killissarititassatut malitassanut naleqqiullutik timaat kviksølvnik akoqarnerupput. Kalaallit Nunaata avannaani nunaqarfinni arnat, kinguaassiorsinnaassuseqarfiusunik ukiullit tamarmik killissarititassatut ilitsersuutaasunit annertunerusumik akoqarput. Najukkani immami avatangiisinut kuutsitat killilersornerisigut, najukkani illoqarfinnut qanittuni mingutsitsineq allanngortissinnaavarput. Taamaattumik najukkani kuutsitanik killilersuiniarluta innuttaasut akuutinneqarnissaat, aammalu timit kviksølvimik akoqalarternerisa kingunerisassaat pillugit paasititsiniaanissaq pingaarutilinnut ilaapput.

Nunat kviksølvnik mingutsitsinermi sunnerneqarsinnaanerpaat ilagaagut. Kviksølvi Issittumi avatangiisitsinnut inuussutissanullu tuttartut annersaat silaannaq imaluunniit immap sarfai aqqtigalugit Issuttumut apuuttarput. Taamaattumik isumaqatigiisutit pitsaasuunissaanut nunarsuarmi nunat sapinngisamik amerlanerpaat kviksølvnik atuinnermik killilersuinnermi suleqatigiinnissaat, aammalu isumaqatigiisummut ilaalernissaat pingaaruteqarpoq. Tamanna pissutigalugu nunarsuarmi kviksølvnik atuinnermik killilersuinissaq pillugu nunani tamalaani isumaqatigiisuteqarnissaq, avatangiisitta kviksølveqalernissaannut killilersuinissamut pingaaruteqartorujussuavoq. Tamatuma saniatigut isumaqatigiisummut akuulernerminu inuussutissat kviksølvnik akoqalarternerinik killilersuinissamut atatillugu paasititsiniaanerput nukittorsarneqarsinnaavoq, aammalu eqqakkat kviksølvnik akullit katersorneqartarnerisa pingaaruteqassusianik eqqumaffiginninnerput annertusineqarsinnaalluni.

Avatangiisitsinnut peqqissutsinnillu mianerinninnissarput pingaaruteqarpoq.

Taamatut oqaaseqarlunga siunnersuutip akuerineqarnissaa innersuussutigaa.